

*Witom Cie Babciu*

*Downo zech niy pisał ale teraz już byda czynścij to robiył.*

*Jak wiysz, że zech teraz w stolicy Papui a dokładnyj w Port Moresby, Móm przerwa w kursie jynzyka, bo na uniwersytecie sóm terazki ferie, Byda sam do końca stycznia. Na co dziyń robia w „Wantok Niuspepa” Jest to wydawnictwo jedynej na świecie gazety w jynzyku lokalnym Pidgin (godo się Pisin). Zrobiylech im stróna internetowo [www.wantokniuspepa.com](http://www.wantokniuspepa.com) i teraz jóm administruja. Oprócz tego, staróm się coś zrobić tukej do wspólnoty w domie na 5 mili. Najczynścij to warza sam ku uciesze starszych misjonarzy ze Polski. Jak zech łostatnio zrobiył kluski ślonski, to zjedli tak pryndko, aż im się uszy trzynśły. No a warza to co znóm z doma i trocha eksperymentuja ale jak na razie co jo im zrobia, to im smakuje .*

*Dzisiej jest już po swiyntach a przeżyłech je trocha po naszymu, trocha po Nowogwinejsku. Wilijo my se zrobili 23 w gronie polskich współbraci. Zaczyli my od Mszy Śwyntej z kolyndami i to było niesamowite, mimo to, że było tak daleko od Polski i od Ślonska, kaj zech zawsze najlepšíj przeżywoł śwynta. Po mszy siedli my do wieczerzy i chocioż nie było moczki czy makówki to tyż było dobre. Narychtował zech co umia czyli zupa z nudlami z kury, pieczyń wołowo, zymioki, a zamiast karpia smażono ryba morsko baramundi. Superancko było posiedzieć w polskim gronie, pośpiywać kolyndy i pogodać o wiliji we ojczyźnie Niy powiyim że mi nie było tesno do was ale zech wiedziół że na wiliji bydziecie o mnie myśleć tak jak jo o was myśłół.*

*Na pasterka pojechali my do katedry. Co prowda cijnżko było mi przeżywać jóm jak u nos zawsze, bo teraz widza jak bogato je nasza kultura i jak zostowo w nos na zawdy. Na dodatek Biskup był wyraźnie zmynczony po przeżytej malarii, a jo zaś po wysłuchaniu jego kozania. Mojim zdaniym było za fest politycznie ale tukej ponoć to normalne.*

*Na mszo świónteczno natomiast pojechołech do kościoła Salezianów. Piykny kościół już bardziej europejski i rychtyk się przygotowali z oprawóm tej uroczystości i ta msza mimo tego że nie było kolynd i elemyntów naszej kultury tak mi drogij, to zech jom przeżył rychtyk dobrze.*

*A jak zech tela napisał o jedzyniu, to musza jeszcze wspomnieć że jak zech po swiyntach zrobiył bigos, to bardzo mnie ucieszyło jak Nowogwinejczyk kiery je gościym w naszym domu, zajadoł sie nim i yno na talyrz ładowoł. Powiedziół mi że oni majom kapusta i wszystko co trza ale nie wiedzom jako jom gotować, jako doprawiać by zrobić coś tak pysznego i prostego. Jak oni zajodajom sie i smakuje im ślonsko i polsko kuchnia.*

*Jak przyjada do dom na wakacje, to zrobia wóm „Mumu”, tradycyjne tutejsze jedzyni ale o tym napisza kiedy indziej.*

*Byda już kończyć i póda zaroz spać, bo pisza to w nocy jak je chłodnij i wtedy lepij sie skupióm.*

*Wiysz babciu choć powinna już być tukej pora deszczowo to sie spóźnio i jest taki gorónc, że cijnżko sie śpi. Mysla że tyn klimat tukej mo i dobre strony, bo przynajmniyj ni musza myśleć o zimowych lóntach.*

*Sciskóm Cie Babciu fest i życza Ci Błogosławionego Nowego Roku.*

*Z Bogiym Przaja Ci i rzykóm za Ciebie*

*Twój Wnuczek Misjonarz*

*Serdecznie życza wszystkim parafianom Błogosławionego Nowego Roku pełnego radości, przonia Boga i bliźnich.*

*Z darym rzykanio Br. Szymon Porwoł SVD*